

宋高僧傳卷第十一

家一

宋左街天壽寺通慧大師賜紫沙門贊寧等奉勅撰

習禪篇第三之四

正傳二十一
八附見四八

唐洛陽伏牛山自在傳一

一鉢和
尚南印

汾州開元寺無業傳二

家一

長沙東寺如會傳三

南陽丹霞山天然傳四

常州芙蓉山太毓傳五

南嶽西園蘭若曇藏傳六

靈泉
超岸

鄂州大寂院無等傳七

天目山千頃院明覺傳八

杭州秦望山圓脩傳九

池州南泉院普願傳十

澧陽雲巖寺曇晟傳十一

荊州福壽寺甄公傳十二

趙州東院從諗傳十三

京兆華嚴寺智藏傳十四

潭州道吾山圓智傳十五

明州大梅山法常傳十六

揚州慧照寺崇演傳十七

鹽官鎮國海昌院齊安傳十八

京兆聖壽寺恒政傳十九

大瀉山靈祐傳二十

黃州九井山玄策傳二十一

唐洛京伏牛山自在傳

一鉢和
尚南印

釋自在俗姓李吳興人也生有奇瑞稍長坐

則加趺親黨異之辭所愛投徑山出家於新

定登戒及諸方叅學從南康道一禪師法席

懸解真宗逸蹤流輩道譽孔昭行止優游多

隱山谷四方禪侶叢萃其門元和中居洛下

香山與天然禪師爲莫逆之交所遊必好古
思得前賢遺跡以快逸觀龍門山得後魏三
藏翻經處王屋山得稠禪師解虎鬪處此山
飲甘泉改爲甘泉寺嵩山得梵法師馬跑泉
居無戀著所著三傷歌辭理俱美警發迷蒙
有益於代前蜀王氏僞乾德初有小軍使陳
公娶高中令駢諸孫女若人持不殺二十餘
年後在蜀爲男婚娶禮須屠宰高初不欲親
戚言自己持戒行禮酒筵將何以娛賓也依
違之際遂多庖割俄未浹旬得疾頗異口但
慌言已而三宿還蘇述冥間之事初被黑衣
使者追攝入岐府城隍廟廟神裁冠大袖與
一金甲武士晤坐使者領高見神武士言語
紛紜讓高破戒仍扼腕罵曰吾護戒神將也
爲汝二十年食寢不違豈期忽起殺心頓虧

戒檢命雖未盡罪亦頗深須送冥司懲其故
犯城隍神問高曰汝更修何善追贖過尤平
高常誦持上生經其數已多于時憐然都無
記憶恐懼之間白曰誦得三傷頌一鉢和尚
歌遂合掌向神厲聲而念神與武士聳耳擎
拳立聽顏色漸怡及卒章神皆涕淚乃謂高
曰且歸人間宜切營善拜辭未畢颯然起坐
備陳厥事自此三傷一鉢之歌頌人皆傳寫
諷誦焉一鉢和尚者歌詞叶理激勸憂思之
深然文體涉里巷豈加三傷之典雅乎在遣
弟子去江南選山水之最者吾願往中終老
到江州都昌縣有好林泉迴報在行至葉縣
道俗所留往隋州開元寺示滅年八十一則
長慶元年也

系曰稽諸律藏出家者犯戒則招二罪一違

制二業道也高氏在家素不受戒無違制憊俗容有業道罪寧得有護戒神邪況高氏既持不殺則冥然感止持無作之善生焉因鮮克有終致遭幽責告諸五衆當畏護戒之神夫如是明則有戒法幽則有鬼神歟

次成都府元和聖壽寺釋南印姓張氏明寤之性受益無狀得曹溪深旨無以爲證見淨衆寺會師所謂落機之錦濯以增妍銜燭之龍行而破暗印自江陵入蜀於蜀江之南壩雜草結茆衆皆歸仰漸成佛宇貞元初年也高司空崇文平劉闢之後改此寺爲元和聖壽初名寶應也印化緣將畢於長慶初示疾入滅營塔葬于寺中會昌中毀塔大中復於江北寶應舊基上創此寺還名聖壽印弟子傳嗣有義俛復興禪法焉

唐汾州開元寺無業傳

釋無業姓杜氏商州上洛人也其母李氏忽聞空中言曰寄居得否已而方娘誕生之夕異光滿室及至成童不爲戲弄行必直視坐即加趺商於緇徒見皆驚歎此無上法器速令出家紹隆三寶年至九歲啓白父母依止本郡開元寺志本禪師乃授與金剛法華維摩思益華嚴等經五行俱下一誦無遺年十二得從剝落凡叅講肆聊聞即解同學有所未曉隨爲剖析皆造玄關至年二十受具足戒於襄州幽律師其四分律疏一夏肄習便能敷演兼爲僧衆講涅槃經法筵長開冬夏無倦可謂生肇不泯琳遠復興後聞洪州大寂禪門之上首特往瞻禮業身逾六尺屹若山立顧必凝睇聲作洪鐘大寂一見異之笑

而言曰巍巍佛堂其中無佛業於是禮跪而言曰至如三乘文學粗窮其旨嘗聞禪門即心是佛實未能了大寂曰只未了底心即是別物更無不了時即是迷若了即是悟迷即衆生悟即是佛道不離衆生豈別更有佛亦猶手作拳拳全手也業言下豁然開悟涕淚悲泣向大寂曰本謂佛道長遠勤苦曠劫方始得成今日始知法身實相本自具足一切萬法從心所生但有名字無有實者大寂曰如是如是一切法性不生不滅一切諸法本自空寂經云諸法從本來常自寂滅相又云畢盡空寂舍又云諸法空爲座此即諸佛如來住此無所住處若如是知即住空寂舍坐空法座舉足下足不離道場言下便了更無漸次所謂不動足而登涅槃山者也業既傳

家一

五

心印尋詣曹溪禮祖塔迴游廬嶽天台及諸名山徧尋聖跡自洛抵雍憩西明寺僧衆咸欲舉請充兩街大德業默然歎曰親近國王大臣非予志也於是至上黨節度使相國李抱真與馬燧累有戰功又激發王武俊同破朱滔功多勢盛然好聞賢善雖千里外必持幣致之深重業名行旦夕瞻禮麾幢往來常有倦色謂門人曰吾本避上國浩穰名利今此又煩接君侯豈娛心哉言訖逍遙縣上抱腹山又往清涼山於金閣寺讀大藏經星八周天斯願方畢復振錫南下至于西河初止衆香佛刹州牧董叔纏請住開元精舍業謂弟子曰吾自至此不復有遊方之意豈吾緣在此邪於是撞鐘告衆作師子吼雨大法雨垂二十年并汾之人悉皆向化憲宗皇帝御

宇十有四年素嚮德音乃下詔請入內辭疾不行明年再降綸旨稱疾如故穆宗皇帝即位之年聖情虔虔思一瞻禮乃命兩街僧錄靈準公遠賫勅旨迎請準至作禮白之曰知師絕塵物表糠粃世務法委國王請師熟慮此迴恩旨不比常時願師必順天心不可更辭以疾相時而動無累後人業笑曰貧道何德累煩聖主行即行矣道途有殊於是剃髮澡浴至中夜告弟子慧愔等曰汝等見聞覺知之性與太虛同壽不生不滅一切境界本自空寂無一法可得迷者不了即爲境惑一爲境惑流轉不窮汝等當知心性本自有之非因造作猶如金剛不可破壞一切諸法如影如響無有實者故經云唯有一事實餘二則非眞常了一切空無一物當情是諸佛同

宋一

六

用心處汝等勤而行之言訖加趺而坐奄然歸寂嗚呼可謂於生死得自在也俗齡六十二僧臘四十二道俗號慕如喪考妣乃備香華幢幡遷全身就于城西練若積香薪而行茶毗乃有卿雲自天五色凝空異香西來郁馥氤氳闔境士庶咸皆聞覩及薪盡火滅獲設利羅聚若珠玉弟子慧愔行勤虔縱義幽元度恒泰等泣血收之殮以金棺乃命郢匠琢石爲塔以長慶三年十二月二十一日安葬于練若之庭業遷化之歲州牧楊潛得僧錄準公具述其事遂爲碑頌勅謚大達國師塔號澄源焉

唐長沙東寺如會傳

釋如會韶州始興人也大曆八年止國一禪師門下後歸大寂法集時禪客仰慕決求心

要僧堂之內牀榻爲之陷折時號折牀會猶
言鑿佛牀也後徇請居長沙東寺焉自大寂
去世其法門鼎盛時無可敵諺謂東寺爲禪
窟斷可知矣時相國崔公群慕會之風來謁
于門答對瀏亮辭咸造理自爾爲師友之契
初群與皇甫^{家一}鑄議上憲宗尊號因被鑄構出
爲湖南觀察閑豫歸心于會也至穆宗長慶
癸卯歲終于寺春秋八十時井泉預枯異香
秘馥遷塔于城南廉使李翱盡毀近城墳塔
唯留會所瘞浮圖以筆題曰獨留此塔以別
賢愚矣劉膳部軻著碑焉勅謚傳明大師塔
曰永際亦呼所居爲夾山和尚是歟
唐南陽丹霞山天然傳
釋天然不知何許人也少入法門而性梗槩
謁見石頭禪師默而識之思召其自體得實

者爲立名天然也乃躬執爨凡三年始遂落
飾後於嶽寺希律師受其戒法造江西大寂
會寂以言誘之應答雅正大寂甚奇之次居
天台華頂三年又禮國一大師元和中上龍
門香山與伏牛禪師爲物外之交後於慧林
寺遇大寒然乃焚木佛像以禦之人或譏之
曰吾茶毗舍利曰木頭何有然曰若爾者何
責我乎元和三年晨過天津橋橫卧會留守
鄭公出呵之不去乃徐仰曰無事僧留守異
之乃奉束素衣兩襲月給米麩洛下翕然歸
信至十五年春言吾思林泉乃入南陽丹霞
山結庵以長慶四年六月告門人曰備沐浴
吾將欲行矣乃戴笠策杖入屨垂一足未及
地而卒春秋八十六膳部員外郎劉軻撰碑
紀德焉勅謚智通禪師塔號妙覺

唐常州芙蓉山太毓傳

釋太毓姓范氏金陵人也年纔一紀志在出家乃禮牛頭山忠禪師而師事焉於是勇猛精進求其玄旨法器外朗神襟內融雖明了一乘而具足萬行往雍京安國寺進受具戒

家一

八

居感化所至悅隨道俗相望動盈萬數自此江南之人悟禪理者多矣時相國崔公群坐失守出分司後為華州由三峯出鎮宣城其地雖邇其人則遐崔公深樂禮謁致命誠請毓以感念而現大悲為心莫不果欲隨緣遊方順命寶歷元年至于死陵禪定寺所以隨順而揚教也至明年告歸齊雲山九月合朔色相不動而示滅于山之院享年八十僧臘五十八是日也天地如慘草木如摧鳥獸悲啼雲泉斷咽家一繼徒士庶孺慕充窮十月棲神于院之庭從其家一宜也弟子至孚契真清幹等慨吾師示滅而後學徒存大和二年相國韋處厚素尚玄風道心惇篤以事奏聞天子爰降德音褒以殊禮追謚號塔名越州刺史陸亘摘翰論譔焉

唐南嶽西園蘭若曇藏傳

靈畧 超岸

釋曇藏不知何許人也得禪訣於大寂之門後見石頭希遷禪師所謂再染謂之賴也貞元二年嘉遁于衡嶽棲止峯之絕頂晚年苦於脚疾移下西園結茅參請者繁熾大和元年終于嶽中享齡七十先是藏養一犬尤靈嘗夜經行息坐次其犬銜藏之衣歸房乃於門閭旁伏守而吠聲不絕頻奮身作猛噬之勢詰旦視之東廚有大蟒蛇身長數丈蟠繞小舍爲之岌業呀張其口虺闕其聲毒氣漫然侍者白藏亟去迴避藏曰死而可逃何遠之有彼以毒來我以慈受毒無自性激發則強慈苟無緣寃親一揆無人無我法性俱空言訖其蟒蛇按首徐行閃然不見又嘗一夜有群盜其犬亦銜藏衣藏語盜曰諸君山叟

茅舍有中意物任拈去終無少恠之分盜感其言散分下山矣又荊州永泰寺釋靈畧姓蕭氏蘭陵人也其胄衰則後梁爲周所滅支屬星分畧父居長沙爲編戶矣生畧宛有出塵之誓遇諸禪會罕不登臨止泊維青優游自得長慶元年住百家巖寺未幾徙步江陵太守王潛請居永泰寺大和三載六月二十三日終于住寺春秋七十五建塔于州北存焉又釋超岸丹陽人也先遇鶴林素禪師處衆拱默而已家一天寶二載至撫州蘭若得大寂十開發四方羈侶依之

唐鄂州大寂院無等傳

釋無等姓李氏今東京尉氏人也負志卓犖辭氣真正少隨父官于南康頻遊梵刹向僧瞻像往即忘歸既作沙門遇道一禪師在龔

公山學侶蠟慕等求法於其間挺然出類元和七年遊漢上後至武昌觀郡西黃鵠山奇秀遂結茅分衛由此巴蜀荆襄尚玄理者無遠不至矣大和元載屬相國牛公僧孺出鎮三江聞等道香普熏遐邇命駕枉問風虎相須爲法重人牛公慮其蘭若不隸名藉特爲奏題曰大寂也憧憧往來堂無虛位至四年十月示滅年八十二弟子誓通奉全身入塔焉

唐天目山千頃院明覺傳

釋明覺俗姓猷河內人也祖爲官嶺南後徙居爲建陽人也覺儒家之子風流蘊藉好問求知曾無倦懈宿懷道性聞道一禪師於佛跡嶺行禪法往造焉遂依投剃染由此即願觀方衡嶽天台四明徧嘗法味復於徑山留

家一

十一

心請決數夏負薪面黥手胠下山至杭州大雲寺禁足院門續移止湖畔青山頂結庵而止屬范陽盧中丞嚮風躬謁召歸州治大雲寺住持元和十五年避嫌遠竄隱天目山是山也特秀基墟跨涉四郡有上下龍潭深不可測怪物往往出于中有白鹿毛質詭異土人謂爲山神也覺遁是中檀信爲禪宇長慶三年春及冬至明年二月大旱野火蔓延欲燒院僧惶懼覺曰吾與此山有緣火當速滅少選雷雨驟作其火都滅遠近驚歎以大和五年七月十九日示疾而亡

唐杭州秦望山圓脩傳

釋圓脩姓潘氏福州閩人也生而岐嶷長而俊邁忽思拔俗尋事名師剔髮變衣年滿於嵩陽會善寺納戒旣而儀表容與日新厥德

研窮經論俄約觀方遇百丈山海禪師根教相符遂明心要持盃振錫而抵于杭見秦望山峻極之勢有長松枝繁結蓋遂棲止于松巔時感鵲復巢於橫枝物我都忘羽族馴狎由茲不下近四十秋每一太守到任則就瞻仰號鳥窠禪師焉洎元和初邗伯裴常棣酷重其道請下結庵者至于三四或爲參請者說法裴侯命八屬宰官同力造伽藍移廢額曰招賢以居之大和七年癸丑歲九月二十二日端坐怡然歸寂享年九十九僧臘八十杭之累政良守無不傾重稅駕樹陰請談玄極不覺更僕移辰矣今塔在石甌山下南嶽僧唯貞爲塔銘焉近有盜發其塔且多怪異止收得銘誌而已

唐池州南泉院普願傳

家一

十二

釋普願俗姓王鄭州新鄭人也其宗嗣於江西大寂大寂師南嶽觀音讓讓則曹溪之冢子也於願爲太父其高曾可知也則南泉之禪有自來矣願在孕母不喜葷血至德二年跪請於父母乞出家脫然有去羈鞅之色乃投密縣大隈山大慧禪師受業苦節篤勵胼胝皸瘃不敢爲身主其師異之大曆十二年願春秋三十矣詣嵩山會善寺曷律師受具習相部舊章究毗尼篇聚之學後遊講肆上楞伽頂入華嚴海會挾中百門觀之關鑰領玄機於疏論之外當其鋒者皆旗靡轍亂大寂門下八百餘人每叅聽之後尋繹師說是非紛錯願或自默而語群論皆珥曰夫人不言乃言爾耳自後含景匿耀似不能言者人以其無法說或扣其關亦堅拒不洩時有密

隨其機者微露頭角乃知其非無法說時未
至矣貞元十一年挂錫池陽南泉山煙谷刊
木以構禪宇簞笠飯牛溷于牧童斫山畬田
種食以饒足不下南泉三十年矣夫洪鐘不
為建撞發聲聲之者故有待矣大和年初宣

第十一

十三

便陸公巨前池陽太守皆知其抗迹塵外為
四方法眼與護軍彭城劉公同迎請下山北
面申禮不經再歲毳衣之子奔走道途不下
數百人大和甲寅歲十月二十一日示疾十
二月二十三日有白虹貫於禪室後峯占之
者得非南泉謝世乎是日西峯巨石崩聲數
十里當晝有乳虎遶禪林而號眾咸異之二
十五日東方明告門人曰星翳燈幻亦久矣
勿謂吾有去來也言訖而謝春秋八十七僧
臘五十八契元文暢等凡九百人皆布衣墨

巾泣血于山門赴喪會葬者相繼於路哀號
之聲震于崖谷乙卯歲門人奉全身於靈塔
從其教也膳部員外郎史館修撰劉軻欽若
前烈追德頌美焉

唐澧陽雲巖寺曇晟傳

釋曇晟俗姓王氏鍾陵建昌人也始生有自
然胎衣右袒猶縑服焉遂請出家於石門年
滿具法參見百丈山海禪師二十年為侍者
職同慶喜法必我聞身若中消心居散位續
受藥山舉發全了無疑化徒孔勤受益者眾
以大和三年己酉十月二十七日示滅勅謚
大師號無相塔名淨勝焉

系曰商那和脩華言胎衣也以其生帶衣而
誕以繒肉而非幼為縑裸長且稱身出家成
法服至入滅闍維方為煨燼焉晟師之有胎

衣止不及爲嬰兒已往之服耳此近叔離尼
商那尊者也思過半矣何邪晟師去聖懸遠
和修佛滅百年將胎衣示有行果之徒也今
晟以胞袒絡化其教理之世不其難乎故曰
思過半矣

唐荊州福壽寺甄公傳

家一

十四

釋甄公姓魯氏江陵人也少而警慧七歲誦
通詩雅遂應州舉三上中第未釋褐與沙門
議論玄理乃願披緇投福壽寺辨初法師以
爲模範後於洛京昭成寺講法數座因禮嵩
山禪師通暢心決方至丹陽茅山尋挂錫於
蘇州楞伽山四遠叅玄者駢肩疊足矣時白
樂天牧是郡接其談道不覺披襟解帶心遊
無物之場得甄之間闕矣遂堅請出水流寺
不樂安止以山水爲娛情之趣耳大和三年

示疾云終九十歲以其年四月十七日入塔
焉

唐趙州東院從諗傳

釋從諗青州臨淄人也童稚之歲孤介弗群
越二親之羈絆超然離俗乃投本州龍興伽
藍從師翦落尋往嵩山琉璃壇納戒師勉之
聽習於經律但染指而已聞池陽願禪師道
化翕如諗執心定志鑽仰忘疲南泉密付授
之滅跡匿端坦然安樂後於趙郡開物化迷
大行禪道以真定帥王氏阻兵封疆多梗朝
廷患之王氏抗拒過制而偏歸心於諗諗嘗
寄塵拂上王氏曰王若問何處得此拂子答
道老僧平生用不盡者物凡所舉揚天下傳
之號趙州法道語錄大行爲世所貴也
唐京兆華嚴寺智藏傳

家一

十五

釋智藏姓黃氏豫章上高人也父爲洪州掾藏隨父入報國寺見供奉皓月講涅槃經微體經意樂入佛門年甫十三割恩愛辭父母於開元寺宗法師所受學後修禪法證大寂一公宗要矣建中元年入長安廬元顯素奉其道舉奏入內供養勅令住華嚴寺輦轂之間玄學者孔熾就藏之門若海水之歸投琴之壑矣大和九年終于住寺三月十二日入塔焉

唐潭州道吾山圓智傳

釋圓智俗姓張豫章海昏人也總州之年頓求出離禮涅槃和尚躬執餅屨爰登戒地誓叩禪門見乎藥山示其心訣後居長沙道吾山海衆相從猶蜂蟻之附王焉以大和九年乙卯九月十一日長逝享年六十七闍維得

不灰之骨數片腦蓋一節特異而清瑩其色如金其響如銅乃建塔于石霜山勅謚脩一大師寶相之塔得其道者則普會焉智公初領悟藥山宗旨儼師誨之曰吾無寶玉大弓以爲分器今賞汝犢鼻一褌雖云微末而表親褻歟南嶽僧玄泰著碑頌

唐明州大梅山法常傳

釋法常俗姓鄭襄陽人也稚歲從師於荆之王泉寺凡百經書一覽必暗誦更無遺忘冠年受具足品於龍興寺容貌清峻性度剛敏

家一

十六

納衣囊鉢畢志外齋貞元十二年自天台之于四明餘姚之南七十里寓仙尉梅子真之舊隱焉昔梅福初入山也見多龍穴神蛇每吐氣成樓閣雲雨晦冥邊有石庫內貯仙藥神仙經籍常寄宿于房乃夢神人語之曰君

非凡夫因話及石庫中聖書懸記既往將來之事受之者爲地下主不然爲帝王之師傅矣常謂之曰石庫之書非吾所好昔僧稠不顧仙經其卷自亡吾以涅槃爲樂厥壽何止與天偕老邪神曰此地靈府俗氣之人輒難居此立致變怪常曰吾寓跡於梅尉之鄉非久據焉因號梅山也由是編苦伐木作覆形之調居僅四十年驗實非常之人也開成年初院成徒侶輻湊請問決疑可六七百納徒矣四年常忽示疾九月十九日山林搖盪鳥獸悲鳴辭衆而逝報齡八十八戒臘六十九十月十九日焚于南澗收舍利五色粲然圓轉焉常先隱梅嶺有僧求拄杖見之白鹽官安禪師曰梅子熟矣汝曹往尋幸能療渴也進士江積爲碑云爾

宋一

十七

唐揚州慧照寺崇演傳

釋崇演姓段氏東平人也出家于本州龍興寺慧超法師之門遊方問道見嵩陽善寂禪師示其心法後居都梁山當于淮浦四面來商義客影附焉相國李公紳鎮撫廣陵而性剛嚴少所接與偏輕釋子或允相見必問難鋒起祇應不供者多咄叱而出紳遣衙吏章幼成傳意召演入府誦對詣理談論鏗然紳惘然翻不測其畛域特加歸信請居慧照寺化導同聲相應僅于千衆開成二年終于淨院春秋八十四以十月二十三日全身入塔云

唐杭州鹽官海昌院齊安傳

釋齊安俗姓李實唐帝系之英先人播越故生于海門郡焉深避世榮終祕氏族安在胎

母夢日兆祥既誕而神光下燭數歲有異僧
款門召見摩頂曰鳳穴振儀龍宮藏寶紹終
之業其在斯乎及臻卅角亟請出家父母訶
止安曰祿利之養止於親爾冥報之利不其
遠邪珪組之榮止於家爾濟拔之益不其廣
邪二親感其言而順從遂依本郡雲琮禪師
雖勤勞謙默和光同塵而螢月殊暉雞鶴異
態年滿登具乃詣南嶽智嚴律師外檢律儀
內照實相後聞南康龔公山大寂禪師隨化
度人慈緣幽感裹足振錫一日造焉大寂欣
其相依論持不倦及其蛻去安盡力送終元
和末安春秋已逾七十而遊越之蕭山法樂
寺以其古製垣屋靡完補壞扶傾不克宴坐
時海昌有法旰者緇林翹楚於放生池孺廢
地肇葺禪居焉旰謙而不自有延請安主之

四海參學者麈至焉道化之盛翕然推伏安
不言寒暑不下堂廡無流眄無傾聽如此者
蓋有年矣而又挺身魁岸相好莊嚴眉毫紺
垂顱骨圓聳望之者如仰嵩華而揖滄溟曾
無測其高深也以會昌二年壬戌十二月二
十二日泊然宴坐俄爾示滅先時竹栢盡死
至是精彩益振爰有清響叩戶祥光滿室如
環佩之鏘鳴若劔戟之交射瑞相尤繁事形
別錄又安懸知宣宗皇帝隱曜繼行將來法
會預誠知事曰當有異人至此禁雜言止橫
事恐累佛法明日行脚僧數人叅禮安默識
帝遂令維那高位安置禮殊他等安每接談
話益知貴氣乃曰貧道謬為海衆圍遶患齋
不供就上座邊求一供疏帝為操翰攄辭安
覽驚悚知供養僧費去所獲豐厚殆與常度

不同乃語帝日時至矣無滯泥蟠囑以佛法
後事而去帝本憲宗第四子穆宗異母弟也
武宗恒憚忌之沉之于官廁宦者仇公武潛
施拯護俛髻髮爲僧縱之而逸周遊天下險
阻備嘗因緣出授江陵少尹實惡其在朝耳
武宗崩左神策軍中尉楊公諷宰臣百官迎
而立之聞安已終愴悼久之勅謚大師曰悟
空乃以御詩追悼後右貂盧簡求爲建塔焉
唐京師聖壽寺恒政傳

釋恒政姓周氏平原人也未入法前隨入鄉
校殊不嗜書籍或見佛經耽味不捨後棄俗
從師就本州延和寺詮澄法師下受誦經法
既登戒已問道于嵩少決了無壅遁跡三峯
放蕩自在無幾入太一中甫行風教學人
蠶慕大和中文宗皇帝酷嗜蜃蛤沿海官吏

先時逾進人亦勞止一日御饌中盈椀而進
有擘不張呀者帝觀其異即焚香祝之俄爲
菩薩形梵相克全儀容可愛遂致於金粟檀
香合以玉絲錦覆之賜興善寺令致禮之始
宣問群臣斯何瑞也相國李公德裕奏曰臣
不足知唯知聖德昭應其諸佛理聞終南山
有恒政禪師大明佛法博聞強識詔入宣問
政曰貧道聞物無虛應此乃啓沃陛下之信
心耳故契經中應以此身得度者即現此身
而爲說法也帝曰菩薩身已見未聞說法政
曰陛下覩此爲常非常耶信非信耶帝曰希
奇事朕深信焉政曰陛下已聞說法了皇情
悅豫得未曾有勅天下寺院各立觀音像以
答殊休其菩薩至會昌毀佛舍乃亡所在因
留政內道場中累辭入山宣住聖壽寺至武

宗即位忽入終南或問其故曰吾避仇烏可
已乎哉後終山舍年八十七闍維收舍利四
十九粒以會昌三年九月四日入塔後有廢
教之勅政之先見若合符節焉

系曰蜃蛤中胡得菩薩像乎通曰有所警發

時一現耳近聞偽唐李氏國境荐饑陂湖間

家一

二十

多生麤蚌百姓競取而食其年免殍仆者十
有七八明年豐民猶采之無何有獲巨蚌可
二尺餘提歸擘磔擊瀟曾無少損其人呪垂
放之俄自開張吐出佛像長僅尺許相好具
全若真珠色號曰珠佛焉獻李氏後遺與梵
僧焉此意所不及處現形者蓋經中化肉山
魚米以資饑饉歲既豐登胡不屬厭故現相
止足之地

唐大瀉山靈祐傳

釋靈祐俗姓趙祖父俱福州長溪人也祐卅
年戲于前庭仰見瑞氣祥雲徘徊盤鬱又如
天樂清奏真身降靈衢巷諦觀者艾莫測俄
有華巔之叟狀類扇實之人謂家老曰此群
靈衆聖標異此童佛之真子也必當重光佛
法久之彈指數四而去祐以椎髻短褐依本
郡法恒律師執勞每倍於役冠年剃髮三年
具戒時有錢塘上士義賓授其律科及入天
台遇寒山子於途中乃謂祐曰千山萬水遇
潭即止獲無價寶賤卹諸子祐順途而念危
坐以思旋造國清寺遇異人拾得申繫前意
信若合符遂詣泐潭謁大智師頓了祖意元
和未隨緣長沙因過大瀉山遂欲棲止山與
郡郭十舍而遙窺無人煙比爲獸窟乃雜猿
獠之間橡栗充食浹旬有山民見之群信共

營梵宇時襄陽連率李景讓統攝湘潭願預
良緣乃奏請山門號同慶寺後相國裴公相
親道合祐為遭會昌之澄汰又遇相國崔公

慎由崇重加禮以大中癸酉歲正月九日盟
漱畢敷座瞑目而歸滅焉享年八十三僧臘
五十九遷葬于山之右桅子園也四鎮北庭

行軍涇原等州節度使右散騎常侍盧簡求
為碑李商隱題額焉

唐黃州九井山玄策傳

釋玄策俗姓魯會稽人也幼隨父商估赴天

台山光明會乃隋朝智顛禪師立教年別光
月遠近州邑黑白二衆鳩聚策觀殊異遂於
禪林寺智廣師下出家遊方見江西大寂頓
開翳障及徧叅問觀黃陂九井山奇秀乃結
茅為舍學侶若蟬之走明也或慰策曰師之

耐寂寞如此乎策曰致道者忘心矣吾樂甚
哉以大中八年現疾而滅續勅謚大師曰圓
寂塔名智覺焉

宋高僧傳卷第十一

音釋

慌呼廣切 捩腕烏賈切 蕪而綠切 蕪他計切 肄羊
也慌惚也 也捩腕鳥賈切 也蕪餘地也 也蕪他計切 也蕪
切習吃山立 也捩腕鳥賈切 也蕪餘地也 也蕪他計切 也蕪
也於金殮 也捩腕鳥賈切 也蕪餘地也 也蕪他計切 也蕪
也於金殮 也捩腕鳥賈切 也蕪餘地也 也蕪他計切 也蕪
也於金殮 也捩腕鳥賈切 也蕪餘地也 也蕪他計切 也蕪
也於金殮 也捩腕鳥賈切 也蕪餘地也 也蕪他計切 也蕪

疑豈切	死日磔	張也	華切	泐	澤	名	切	泐	也	夏	呼	正切	顛
	也	張也	華切	泐	澤	名	切	泐	也	夏	呼	正切	顛
	也	張也	華切	泐	澤	名	切	泐	也	夏	呼	正切	顛
	也	張也	華切	泐	澤	名	切	泐	也	夏	呼	正切	顛
	也	張也	華切	泐	澤	名	切	泐	也	夏	呼	正切	顛